



BOSNIA AND HERCEGOVINA  
MINISTRY OF FINANCE  
AND TREASURY

CENTRALNA/SREDIŠNJA HARMONIZACIJSKA JEDINICA  
ЦЕНТРАЛНА ХАРМОНИЗАЦИЈСКА ЈЕДИНИЦА

## Izmjena Međunarodnih standarda interne revizije

Globalni institut internih revizora (*The Institute of Internal Auditors - The IIA*) u martu 2023. godine objavio je nacrt predloženih novih Međunarodnih standarda interne revizije (Međunarodni standardi), na svojoj zvaničnoj internet stranici ([www.theiia.org](http://www.theiia.org)), pod nazivom „*Globalni standardi interne revizije – 2023 Nacrt za javnu raspravu*“ i pozvao javnost na dostavljanje povratnih informacija.

Navedeni nacrt Globalnih standarda interne revizije (*Standardi*) predstavlja ključni rezultat višegodišnjih aktivnosti koje je proveo Globalni institut internih revizora u cilju ažuriranja i unapređenja Međunarodnog okvira profesionalne prakse interne revizije (*The IIA's International Professional Practices Framework – IPPF*), kao konceptualnog okvira koji objedinjuje standarde i smjernice na kojima se temelji profesija interne revizije i uređuje način njenog funkcioniranja.

U skladu s objavljenim pozivom za javnu raspravu Globalnog instituta internih revizora, Centralna harmonizacijska jedinica Ministarstva finansija i trezora Bosne i Hercegovine (CHJ MFiT BiH) uputila je početkom aprila 2023. godine poziv svim internim revizorima u institucijama BiH da učestvuju u razmatranju i kreiranju novih Međunarodnih standarda interne revizije. Do roka za dostavu povratnih informacija, 15.05.2023. godine, CHJ MFiT BiH nije zaprimila nijedan prijedlog, niti komentar od jedinica interne revizije i internih revizora, na osnovu čega se može pretpostaviti da interni revizori u institucijama BiH nemaju primjedbi na pripremljeni prijedlog teksta novih Standarda.

Također, imajući u vidu njihov mandat, pozvali smo centralne harmonizacijske jedinice Ministarstva finansija Republike Srpske, Federalnog ministarstva finansija i Direkcije za finansije Brčko distrikta da učestvuju u razmatranju i kreiranju novih Međunarodnih standarda za internu reviziju.

Kao najbitnije elemente predloženih izmjena Standarda, za koje smatramo da su veoma dobar temelj za daljnji razvoj interne revizije, možemo navesti sljedeće:

- Novi Standardi predloženi su u znatno sveobuhvatnijoj formi u pogledu njihovog sadržaja u odnosu na važeće, što značajno olakšava njihovo razumijevanje, a time i primjenu. U novim standardima sadržano je svih pet obavezujućih elemenata važećeg Međunarodnog okvira profesionalne prakse interne revizije:
  - misija interne revizije,
  - definicija interne revizije,

- ključni principi za profesionalnu praksu interne revizije,
  - etički kodeks za interne revizore i
  - Međunarodni standardi interne revizije.
- Također, u novim Standardima dodat je i sadržaj jedne od važećih smjernica koja je, iako nema obavezujući karakter, neizostavan dokument za dosljednu primjenu Standarda interne revizije. Riječ je o Vodičima za primjenu (*Implementation Guidance*) koji ne samo da pružaju detaljna pojašnjenja svakog standarda, nego pružaju i pojašnjenja o pristupu interne revizije i metodologiji rada, kao i razmatranja o specifičnostima ove profesije. Vodiči za primjenu obuhvataju i prakse u radu interne revizije, kao i pitanja specifična za djelatnost i vrste revizorskog angažmana, što značajno doprinosi posebno u segmentu potvrde primjene standarda.
  - Uključivanje ovih smjernica u Standarde predstavlja značajan iskorak u pravcu sveobuhvatnosti, boljeg razumijevanja i olakšane primjene standarda.
  - Predloženo je da se izmijeni naziv trenutno važećih Standarda. Umjesto sadašnjeg naziva „Međunarodni standardi za profesionalnu praksu interne revizije“ predložen je naziv „Globalni standardi interne revizije“.
  - Postojeća struktura Standarda značajno je promijenjena. Umjesto dosadašnje podjele na dvije osnovne kategorije: „Standardi karakteristika“, koji postavljaju zahtjeve u pogledu organizacionog uspostavljanja funkcije interne revizije unutar organizacije i zahtijevanih kompetencija pojedinaca koji vrše funkciju interne revizije, i „Standardi izvođenja“, koji opisuju način izvođenja revizorskih angažmana i osiguravaju kriterije na osnovu kojih se može mjeriti učinak usluga, novi Standardi strukturirani su na sljedeći način:
    - Sastoje se od pet osnovnih cjelina – domena, a to su: *Domen I – Svrha interne revizije*, *Domen II – Etika i profesionalizam*, *Domen III – Upravljanje organizacijom funkcije interne revizije*, *Domen IV – Upravljanje funkcijom interne revizije* i *Domen V – Obavljanje poslova interne revizije*;
    - Za svaki domen vezuju se odgovarajući principi, njih ukupno 15, koji opisuju suštinske elemente interne revizije i služe kao osnova za Standarde interne revizije;
    - Standardi su razvrstani unutar pripadajućih domena i principa;
    - U okviru svakog standarda sadržan je i dio koji pruža opće i poželjne prakse za primjenu zahtjeva navedenih u svakom standardu od strane onih koji su obavezni isti primjenjivati. Sadržan je i dio u kojem su navedeni primjeri kojima se dokazuje i potvrđuje da su zahtjevi predmetnog standarda primijenjeni;
    - Važeći standardi implementacije, koji se odnose na usluge uvjeravanja i savjetodavne usluge, ugrađeni su u sam tekst "osnovnog" standarda kojem pripadaju i nisu izdvojeni kao posebni standardi;
    - Brojčani sistem označavanja standarda u potpunosti je izmijenjen;
  - Smatramo važnim naglasiti da su u predloženim Standardima prvi put istaknute neke od zajedničkih karakteristika javnog sektora.
  - Jedna od novina u predloženim Standardima je i ta da je jasno navedena uloga i odgovornost menadžmenta organizacije u upravljanju funkcijom interne revizije.

Očekuje se da će zvaničan tekst Globalnih standarda interne revizije biti objavljen nakon što budu okončane aktivnosti u vezi s javnom raspravom o Nacrtu predloženih Standarda i

razmatranje povratnih informacija od strane Globalnog instituta internih revizora, a to je kraj 2023. godine.

U skladu s ustaljenom praksom i procedurama Globalnog instituta internih revizora, očekuje se i da će novi Globalni standardi interne revizije stupiti na snagu početkom 2025. godine.

Sarajevo, 21.06.2023. godine

**DIREKTOR**  
Centralne harmonizacijske jedinice  
Ministarstva finansija i trezora BiH

**Mr. Vladimir Stanimirović, s.r.**